

Car salomon dit que la doctrine de l'omme est cogneue par paciēce. Et aultre part dit cil meisme que celui qui est patient se gouerne par grant prudence. Et cil meisme dit. L'omme couroucie fait les noyses et le patient les attrempe. Aussi dit il que mieulx vault estre bon paciēt que biē fort et plus fait a prifier celui qui peult haouir la seignourie de son cueur que celui qui par force prent les grās cites. Et pource dit saint iaques en son espitre q̄ paciēce est oeuvre de perfection.

Qertes dit melibee ie vo^s octroye dame prudence que paciēce est vne grāt vertu mais chascun ne peult pas auoir la perfection que vous ales querant. Je ne suis pas du nombre des biens parfaits et pource mon cuer ne peult estre en paix iusques a tāt quil soit vengies. Et iacoit ce q̄ en ceste vēgance cust grāt peril ie regarde aussi y auoit il grant peril de faire la villennie qui ma este faicte. Et toutesuoyes mes aduersaires nōt pas regarde le peril mais ont hardiemēt acomply leur manuaise voulēte. Et pource il me semble q̄ lon ne me doit pas reprendre se ie me metz en vng pou de peril pour moy vengier et se ie fay vng grāt excès car on dit que excès ne se corrige fors que par oultrage.

Qertes dit dame prudēce vous dictes vostre voulēte mais en cas du mō de lon ne doit faire oultrage ne excès pour soy vēger ne aultrement. Car cassidores dit que aussi ual fait celui qui se vēge par oultrage q̄ celui qui fait loultrage. Et pource vous vo^s deuez vēgier selon lordre de droit nō pas par excès ne par oultrage. Car ainsi cōme vous scauez que voz aduersaires ont pechie encontre vous par leur oultrage ainsi vous pechiez se vous vous voulez vēgier deuz par oultrage et aultremēt que droit ne le commande. Et pource dit seneque. Lon ne doit nulle foys vēgier mauuaitie par mauuaitie. Et se vo^s dictes que droit octroye que lō deffende violēce par violēce et barat par barat. Certes cest verite quāt la deffence se fait incōtinēt et sans entreual et pour soy deffendre nō pas pour soy vēgier. si cōuient mettre telle atrēpance en deffence que lon ne puisse reprēdre celui qui se deffent dexces ne doultrage car aultremēt ce seroit contre droit et contre rayson. Or voys tu biē que tu ne fais pas deffence incontinant ne pour toy deffendre mais pour toy vēgier et se nas pas voulēte de faire ton fait atrēpeemēt. Et pource il me semble encores que la paciēce est bonne. Car salomon dit que celui qui nest paciēt y aura dōmage. Certes dit melibee ie vous octroye que quant vng hōme est impatient